



8

Niining Leksyona Matun-an Mo Kini

Ang Babaye Nga Ning-abtan Nga Nanapaw
Si Jesus Ang Kahayag Sa Kalibutan
Dili Kamo Makaadto Sa Akong Pagaadtoan
Ang Mga Tawong Gawas Ug Ang Mga Naulipon
Si Jesus Ug Si Abraham

ANG BABAYE NGA NING-ABTAN NGA NANAPAW

(Basaha ang Juan 8:1-11)

Naghatag si Jesus ug maayong patukoranan mahitungod sa pagsaway ug paghukom sa uban.

Juan 8:7. “Kinsa kaninyo ang walay sala maoy paunahag labay kaniyag bato.”

Mahimo nga isulat ni Jesus ang mga sala nga nabuhat sa mga katawhan. Busa nanga-ulaw sila ug mibiya.

Si Jesus lamang ang nahibilin didto nga walay sala. Wala Niya hukmi ang babaye. Iya hinoong giluwat ang kinabuhi sa babaye ug gipasaylo ang iyang sala. Gipalakaw ni Jesus ang babaye ug gisultihan nga dili na magpakasala. Kon pasayloon na kita sa Dios dili na kita magpadayon pa sa pagpakasala.

Buhata Kini

1. Sag-uloha ang Juan 8:7. Kon tintalon ka sa pagsaway sa uban, kutloa kining maong ber-sikulo.
2. Pag-ampo alang niadtong mga tawo nga nangayo na ug pasaylo sa Dios apan nagapadayon pa gihapon sa pagpakasala.

SI JESUS ANG KAHAYAG SA KALIBUTAN (Basaha ang Juan 8:12-20)

Misulti si Jesus ngadto sa mga katawhan nga Siya mao ang kahayag sa kalibutan. Kanunay nagahisgut ang Biblia mahitungod sa sala ingon nga kangitngit. Si Jesus sama sa usa ka kahayag nga nagapakita kanato sa atong mga sala ug nagatultol kanato sa dalan padulong sa langit. Dili kita makaadto sa langit hangtud nga mapasaylo na ang atong mga sala. Ang bersikulo 24 nagaingon nga kadtong mga tawo nga wala magatoo kang Jesus mangamatay diha sa ilang sala.

Buhata Kini

3. Basaha pag-usab ang pasi-una nga gisulat ni Juan alang sa Ebanghelyo nga makita sa Juan 1:1-9
4. Nganong gitawag man ni Jesus ang Iyang kaugalingon nga kahayag sa kalibutan?
 - . . . a) Tungod kay Siya mao man ang matuod nga kahayag nga magapakita kanato sa atong mga sala ug magatultol kanato sa dalan padulong sa langit.
 - . . . b) Tungod kay Siya kanunay man nagapanudlo sa adlaw ug dili sa gabii.
 - . . . c) Tungod kay gihatagan Niya ug mga suga ang matag-usa aron magamit nila sa gabii.

DILI KAMO MAKAADTO SA AKONG PAGAADTOAN

(Basaha ang Juan 8:21-30)

Misulti pag-usab si Jesus ngadto sa mga katawhan mahitungod sa Iyang kamatayon. Gi-pasabot kini ni Jesus pinaagi sa pag-ingon nga duna Siyay pagaadtoan diin niini dili ang mga tawo makaadto. Gikan Siya sa langit ug naga-padulong na usab balik ngadto sa langit. Apan sa dili pa kini kinahanglan magpakamatay una Siya sa Krus alang sa mga sala sa kalibutan. Dili ba mao kini ang gisulti ni Jesus ngadto kang Nicodemo diha sa capitulo .3?

“Ako man ang mao Ako” maoy usa sa mga ngalan sa Dios nga gigamit Niya sa dihang nangu-tana si Moises kon unsay ngalan sa Dios. Ang pagkamatay ug pagkabanhaw ni Jesus mao ang nakapatoos kanato nga Siya mao ang atong Manluluwas.

5. Basaha sa makatulo ang bersikulo 23, 24, 28, ug 29.
6. Kinsa may gisultihan ni Jesus nga ang anak sa tawo igapataas, ingon nga gipataas ni Moises ang tumbaga nga bitin didto sa kamingawan?
7. Basaha ang Juan 3:14 ngadto sa 21.

ANG MGA TAWONG GAWAS UG ANG MGA NAULIPON

(Basaha ang Juan 8:31-47)

Miingon si Jesus nga kinsa kadtong nakasala ulipon sa sala. Ang tawong makasasala dili makahimo paghunong sa pagpakasala bisan pag buot niya. Daghan ang nanag-ingon nga wala sila nasayud kon nganong gibuhat nila ang mga butang nga ilang ginabuhat. Dili sila makahimo sa paghunong niini. Ang usa ka ulipon aduna gayuy agalon, ug ang makasasala ulipon sa yawa. Apan kon tumanon ta ang gipanudlo ni Jesus. Iya kitang hatagan ug kagawasan gikan sa sala ug gikan sa yawa.



Juan 8:31, 32, 36. Kon pabilin kamo sa akong pulong, nan, kamo tinuod gayud nga akong mga tinun-an; ug kamo mahibalo sa kamatuoran, ug ang kamatuoran magahatag kaninyog kagawasan. Kon ang anak mao ang magahatag kaninyog kagawasan, kamo mahimo gayud nga mga tawong gawas.

Buhata Kini

8. Saguloha ang Juan 8:31, 32, 36.

9. I-ampo ang imong mga higala nga anaa pa sa kaulipnan sa sala.

SI JESUS UG SI ABRAHAM

(Basaha ang Juan 8:48-59)

Ang ubang mga katawhan nga nakadungog sa mga gipanulti ni Jesus nangasuko. Miingon sila nga wala gayud sila sukad mahimong mga ulipon, ug nga sila gikan sa kaliwat ni Abraham ug natawo nga adunay kagawasan. Dili kita buot motoo nga nahimo kitang mga ulipon ni Satanas. apan mao kini ang tinuod hangtud nga hatagan na kita ug kagawasan ni Jesus.

Sa dihang ang mga Judio naghigut mahitungod kang Abraham, misulti si Jesus nga si Abraham nagmalipayon nga nakakita sa adlaw ni Jesus. Ug miingon pa Siya nga “sa wala pa si Abraham, mao na Ako.” Kining mga pulonga gigamit usab sa Dios didto sa Exodo 3:14

Exodo 3:14. Ug mitubag ang Dios kang **Moises; AKO MAN ANG MAO AKO.** Ug miingon Siya, mao kini ang igaingon mo sa mga anak sa Israel: Ako man, mao ang nagsugo nganha kaninyo.

Kini nakapalagot sa ubang mga ka dagkuan sa mga Judio ug misulay sila pagbato kang Jesus. Apan miikyas si Jesus gikan sa templo tungod kay dili pa panahon alang Kaniya nga Siya magpakamatay. Tinuod nga Siya mianhi alang sa atong mga sala, apan ang yawa dili makapatay Kaniya sa dili pa mo-abot ang panahon sa Dios alang Kaniya.



Buhata Kini

10. Unsa may gisulti ni Jesus mahitungod sa Iyang kaugalingon ug kang Abraham?
 - . . . a) "Si Abraham ako usab nga-amahan."
 - . . . b) "Wala gayud ako makakita kang Abraham."
 - . . . c) "Sa wala pa si Abraham, mao na ako."
11. Itandi ang imong mga tubag sa hustong mga tubag nga anaa sa katapusan niining leksyona.
12. Sulati ang imong rekord sa estudyante alang sa ika-8 nga leksyon.

Mga Tubag sa ika-8 nga Leksyon

Kon aduna kay 3 ka hustong mga tubag, markahi ug labing maayo; kon 2 ra, markahi ug maayo. Kon kubos sa 2 ang imong hustong tubag, basaha pag-usab kining leksyona.

4. a) Tungod kay Siya mao man ang matuod nga kahayag nga nagapakita kanato sa atong mga sala ug magatultol kanato sa dalan padulong sa langit.
6. Nicodemo
- 10.c) "Sa wala pa si Abraham mao na ako."

Gidaghanon sa hustong mga tubag ___
 grado _____